

Amal kaedah kawalan kos — PM

Um - 7/3/2006

Oleh HELMI MOHD FOAD

PUTRAJAYA 6 Mac — Datuk Seri Abdullah Ahmad Badawi mahu kakitangan awam mengamalkan kaedah pengawalan kos yang berkesan bagi mengelakkan pembaziran dalam kerajaan ekoran kenaikan harga minyak diesel dan petrol.

Perdana Menteri berkata, perkara itu perlu dilaksanakan melalui penguatkuasaan yang lebih tegas bagi mengelakkan harga barangan terus meningkat sehingga membebankan para pengguna.

“Kita semua adalah pengguna, jadi masing-masing perlu laksanakan tanggungjawab supaya inflasi tidak naik begitu tinggi.

“Dari segi perbelanjaan kita kena berjimat dan pekeling sudah dikeluarkan seperti penjimatan penggunaan elektrik (jangan) hendak guna satu bilik, pakai elektrik untuk satu *floor*, jangan ada pembaziran dalam kerajaan,” kata beliau pada perhimpunan bulanan Jabatan Perdana Menteri di Dataran Putra di sini hari ini.

Hadir sama ialah Timbalan Perdana Menteri, Datuk Seri Najib Tun Razak, menteri-menteri di Jabatan Perdana Menteri dan Ketua Setiausaha Negara, Tan Sri Samsudin Osman.

Perdana Menteri berkata, kakitangan awam juga perlu mempercepatkan pelaksanaan sesuatu pro-

Kita semua adalah pengguna, jadi masing-masing perlu laksanakan tanggungjawab supaya inflasi tidak naik begitu tinggi

ABDULLAH AHMAD BADAWI
Perdana Menteri

jek kerajaan kerana sebarang kelewatan akan menyebabkan kenaikan kos.

Beliau juga mengingatkan agar aktiviti rasuah tidak berlaku dalam sektor awam kerana ia juga akan meningkatkan kos dan akan menjadi masalah besar kepada kerajaan.

“Nanti rakyat Malaysia dan kerajaan dikenali sebagai rasuah, kita tidak mahu kita digelar sebagai kakitangan 10 peratus atau tiga peratus, jangan ada imej sebegitu,” kata beliau.

Penjimatan

Abdullah yang juga Menteri Kewangan berkata, sekiranya perkara itu tidak dikawal, semua harga barangan dan kos untuk menjalankan perniagaan akan meningkat.

“Maka mereka (peniaga) akan mengalihkan kos tersebut kepada pengguna dan akhirnya pengguna juga menanggung beban,” kata beliau.

Sehubungan itu, Perdana Menteri meminta Kementerian Perda-

gangan Dalam Negeri dan Hal Ehwal Pengguna bertindak tegas untuk menjalankan penguatkuasaan bagi mengelakkan harga barangan dinaikkan.

“Kita sebenarnya telah mengambil tindakan yang sudah lama kita laksanakan, kita sudah letak senarai barangan yang panjang, kita kawal harganya untuk rakyat kita.

“Kita perlu pastikan penguatkuasaan berjalan dengan baik, kalau harga barang naik, yang susah kita juga,” kata beliau.

Dalam pada itu, beliau berkata, kerajaan akan terus berusaha untuk membolehkan rakyat terus mendapat pendapatan yang lebih walaupun daripada punca pendapatan yang sama.

“Ini dalam bidang perindustrian, penyelidikan pertanian dan lain-lain, kita perbanyakkan lagi sumber pendapatan baru dan tambahan untuk rakyat kita.

“Ini dapat dilakukan kerana kita sudah mempunyai pengalaman yang baik dan menghadapi banyak masalah dan halangan,” kata beliau.